

# Atuarfitsialak - atuarfik eqaatsumik aaqqissuussiffiusoq !

[www.fleksibelskole.dk](http://www.fleksibelskole.dk)

Peqqussummi nutaami atuarfiup siunissami siunertarisaa tunngavissaalu siumut takorluuERPalaartumik allaaserineqarput. Unamminartua tassaavoq oqaatsit takorluuERPalaartut Kalaallit Nunaanni meeqqat atuarfianni ulluinnaarisamut nuunniarnissaat. Tamanna qanoq iliorluni anguneqarsinnaava? Apeqqut taanna annertunngikkaluaqaluni akiuminaatsuuvoq.

## Susqalerpoq

Atuarfiup siunertaa tunngavialu atuartitsinerup aaqqissuunneranut aaqqissugaanerannullu toqqammaviutillugit ingerlatsiniarneranni, oqallisigeqqartariaqarpoq paasiniaqqaartariaqarlunilu atuarfik taama ingerlatsiviusoq qanorpiaq isikkoqassanersoq.

Maanna ilinniartitsisorpassuit atuarfippassuillu suliaminnut tunniusimalluarlutik Atuarfitsialammik inerisaalereerput, atuartut siunissami inuiaqatigiinni kalaallini unamminartunik isumaginissinnaalernissaat siunertaralugu. Namminerisamik aallarnisaalluni inerisaanerit tamakkua aallaavigalugit, tulliuuttumi siunissami atuarfimmi atuartitsinerup aaqqissugaanera pillugu takorluukkakka allaaseriniarpakka.

Kisianni siulliullugu pisariaqarsoraara meeqqat atuarfianni aaqqissueriaatsit suleriaatsillu allannqortariaqarnerannut patsisaasut naatsumik – taamaalillunilu annikikkaluamik - allaasereqqarnissaat.

## Inuiaqatigiit allannqortut atugassarititaat allaasut

Tamakkua pillugit Atuagalliutini (14/8-01) Kaali Olsen allappoq: "Silarsuaq avatangiiserput ineriartorlunilu allannqortarpoq. Ineriartornermi taamaattumi malunnartut ilagivaat kulturikkut aningaasarsiornikullu nunarsuaq tamakkerlugu nunallu killeqarfii akimorlugit ataqatigiilerneq. Tamatta timitsigut, tarnitsigut ilisimatusarnerlu eqqarsaatigalugu uninngaannarunnaarpugut. Toorsinerinnakkut Afrikamut Hawaiiimulluunniit anngussinnaavugut, Australiami uumasuaqqat nalinginnaanngitsut pillugit atuagaqarsinnaavugut Internetimilu immiussat nuannarisagut ujarsinnaavagut. Silarsuaq allannqortittarparput silarsuullu periaasitoqqagut, takorloortakkagut, isumaliutigisartakkagut upperisatsigullu takorloortakkagut allannqortiterpai. Atuarfik silarsuarmi taamaattumi pingaarutilimmik suliaasaqarpoq.

Silarsuarmi taamaattumi ilumoortut upperisatoqarsuagut  
naamassinnittarnigullu sapernanngitsut illuinnaasiortullu  
ilisimatusarnerup nutaanik paasinnittaatsinik nalunngisanillu  
ineriartortitsineranit unammillerneqartualissapput. Naleqartitagut  
tamarmik avataaniit apeqqusersorneqartualissaapput, inuusuttullu  
aqqutissanik nutaanik eqqarsartaatsinillu nutaanik ujarlertuarnerisa,  
eqqarsaatigut taakkualu aallaakkaassusaat  
misilerarneqartuartilissavaat, unammillerneqartilissavaat  
atorunnarsissavaallu qanganitsersimasutut atorfissaqanngitsutullu.  
Meeqqatsinnut ullumikkut nalunngisatsinnik ilinniartitsinerput,  
amerlanertigut ima atorsinnaajunnaartigissaaq soorlu skrivemaskina  
qarasaasiamik atuisartumit atorneqarsinnaanngitsoq".  
Pitsaanagerusumik oqaatigineqarsinnaanngilaq!

### **Ilikkagaqarniarneq pillugu oqaatiginnittarneq**

Taamaattuminguna pingaaruteqarlunilu pisariaqarluinnartoq  
ilikkagaqartitsiniarluni ingerlatsinerit isigineqarnissaat. Tamatta -  
inersimasut meeqqallu - unittussaannngitsumik  
paasissutissarpassuarnik tuniorarneqartuarpugut. Paasissutissat  
piumasagut, soorlu assilissat atorlugit saqqummersitsisarfinniit  
paasissutissanillu qarasaasiatigut katersuiffinniit, tamaasa  
sapernanngitsunnguamik pissarsiarisinnaavagut.  
Tamaaliorinnaanerup kingunerigunarpaa paasissutissanik  
pissarsiniarnerujussuarput iluamilli iternga tikillugu  
ilikkagaqarsinnaannginnerput. Ilaatigut oqartoqartarpoq:  
Inuiaqatigiittut maannakkut inuusut eqqarsaatigigaanni  
paasissutissanik taama amerlatigisunik pissarsinissamut siornatigut  
periarfissaqartoqarsimanngilaq, taamaakkaluartorli inuit  
nalunngisaat aatsaat taamak annikitsigilersimapput. Pissutsit  
taamaannerannut pissutaavoq, sunaluunniit  
ilikkarneqarsinnaanngimmat, nammineq pigiliutsinnagu, imaappoq,  
qanoq iliuuseqarsinnaanermut atortussatut paasissutissat katersagut  
immitsinni pigiliutinngikkutsigit ilikkagaqarsimassanngilagut.  
Aatsaat ilikkagaqarsinnaavugut itinerusumik eqqarsaatiginninnikkut  
sungiusarnikkullu. Sungiusarneq pikkorissunngortitsisarpoq!  
Tuttunniarneq puisinniarnarlunniit tuttunik puisinillu piniarnikkut  
ilikkarneqartarpoq, atuarsinnaaneq kisitsisinnaanerlu aamma  
ilikkarneqartarpoq atuarnikkut allannikkullu. Ilaannikkut  
sulerulunnartarpoq ilaannikkulli pinnguarnertut ingerlasinnaasarpoq.  
Kisianni sulerulunneq pinnguarnarlunniit tamatigut imminnut  
akerleriittutut isikkoqartariaqarneq ajorput.

Imaappoq, atuarneq eqqarsaatigalugu naammassisassanik  
aalajangersimasunik pisariaqartitsisoqarpoq atuartut  
ilikkariartortarnerat ilorraap tungaanut ingerlanneqassappat:

1. *Inooqatigiinnikkut qanilaarneq, suliassat pillugit piginnaasassat*

*naamassinnissinnaanermullu upperinnineq pisariaqartinneqarput.* Ilinniartitsisoq perorsaanneq pillugu piginnassuseqartoq tassaavoq atuartunik ilaqarnermini isummamigut atuartunik peqateqarluartoq, suliassaminut pikkorrisoq piunasaqarsinnaanermimullu qunugisaqanngitsoq. Ilinniartitsisoq erseqqissumik "taamaaliussaait", "taanna sungiusassavat"-mik oqaatiginnissinnaanissaminut isummersimasuusariaqarpoq. (Hansen, 1997, qupp. 33).

## *2. Sulineq, aallussineq pisariaqartitalu.*

Atuartut eqqarsaatigalugit pisariaqarpoq:

- isummamikkut eqeersimaartuunissaat, suliassaminnillu aallussinissaat,
- suliassaminnut tunniusimanissaat, taamaaliornerminnilu aallavigisassat pitsaanerpaaq tassaavoq alapernaatsuunissaq apeqqusersuillunilu isumaliutiginnissinnaanissaq,
- *suliassaait*, tunngavigisaat ineriartornerminnilu killiffiat aallaavigalugit *unamminartoqartinneqassasut* (killiffiisa "annertussusaat"eqqarsaatigalugu) (Larsen, 1998)

Ilikkartitsiniarneq pillugu periaatsip taamaattup anguniarpaa imminut sanarfineq atorlugu ilikkarniarnermik isiginnittaaseq, taamaaliornikkut meeqqap ilikkarniartarnerminut piginnaassutsini, nalunngisassaminik pisinnaasassaminillu pissarsiartormini ilutigalugu, inerisartarmagu. (Hansen, 1997). Tamanna pisarpoq meeqqap suleriaatsinik pitsaasunik ilikkariartorneratigut kiisalu suleriaatsinik atorsinnaasaminik sungiusagaqarneratigut. Ilinniartitsineq ilinniartitsisut inuttut pissusaannik naatsorsuutiginnittoq atuartullu atuarfimmi atuarfiullu avataani suleqataanerannik peqataajumanerannillu imaqartoq, aalajangersimasumik skeemaqarluni atuartitsinermit, atuartitsinermit piffissamik ataqatigiinnermillu nikerarnerujussuarmik atuinissamik pisariaqartitsivoq. Piffissamik atuneq, suleriaatsinik suleqatigiiaanillu (hold-inik) pilersitsisarneq nikerarnerusoq taamaaliortarnermi pisariaqartinneqarput. Atuartitsineq pitsaasoq anguniaraanni klassi kisiat aallaavigiuassallugu pisariaqanngilaq.

## **Perorsaaneq aaqqissueriaatsit ininillu avatangiiseqarneq pillugu ataatsimut isiginnittaaseq**

Eqaatsumik atuarfik aaqissugaq, atuartut inuunerminni periarfissaminnik ineriartortitsinissaannik qitiutitsisumik, perorsaaneq pillugu isummanik aallaaveqarpoq tassungalu atatillugu aallaviupput ilinniartitsisut atuartitsinerup aaqqiisorneqartarnera suleqatigiissutigalugu imminnut aquttut. Tassunga ilanngullugu atuarfiup eqaatsup ilinniartitsinermit ininik atuinermi klassimi inigisap ataasiinnaap killigititai akimorlugit pisariaqartippai.



**Atuarfik eqaatsoq unamminartorlu imatut immersorneqarnermigut allaatigineqarsinnaavoq:**

**Perorsaaneq pillugu isummat**

- unamminartumik ilinniarnermi avatangiisit, atuartunut tamanut inuunermi periarfissanik tunisisut.
- atuartitsissutit ataasiakkaat, atuartitsissutit akimorlugit aalajangeriikkanillu anguniagaqarluni atuartitsineq nikerartitaq
- atuartitsinerup imaanik toqqartuinermi, atuartitsissutissat pillugit atuartitsinerullu aaqqissorneqarnera pillugu suleqatigiilluni ingerlatsineq
- IT atuartitsinermut akuutitaq
- atuartut ilikkarniarnermi namminneq anguniagassaminnik aalajangersaaqataasartut

**Aaqqissuussineq**

- atuarfeeraq atuarfiup tamarmiusup iluani
- immikkoortotami suleqatigiit aningaasatigut nalunaaquttallu akunnerinik ilinniartitsiffissanik namminneq oqartussaaffeqartut
- ukiumoortumik piffissamik suliffissamik aalajangersakkat tunngavigalugit piffissanik suliffissanik eqaatsumik nikerartitamillu pilersaarusiortarneq
- suleqatigiit eqaatsumik agguataarneqarsinnaasut (suleqatigiit angisuut, hold-it, eqimattakkaat, marlukkaat, ataasiakkaat)
- aaqqissuulluakkamik paasisutissineq -ataatsimiittarnerlu pillugit periuseqarneq

**Inissatigut avatangiisit**

- init atuartitsiviit isumassarsiat aaqqissuussinerlu tunngavigalugit atortulersorlugillu aaqqissukkat
- torsuusat inilaat sulinermut atugassanngortinneqassapput/sanaqqinneqassapput
- atuarfiup atuakkanik atorniartarfia nukissanik tunioraasuussaaq
- atuarfimmut eqaatsumut
- atuartitsissutini aalajangersimasuni init atuartitsiviit atorneqartussat misiligaavittut ingerlassapput
- atuartitsinerup ilarujussua atuarfiup illutaasa avattaani ingerlanneqartassaaq

**Perorsaaneq pillugu isummat**

Perorsaaneq pillugu isummat tunngaviusut allaaserinerani soorunami aallaaviussaaq, ukiut tusind-illittulliuttut inuiuaqatigiit

ineriartorneranni atuarfimmu piumasaqaataasussanik,  
nassuerutiginnineq.

Nalussanngilarput imaluuniit maluginiassavarput, atuartut  
piginnaassutsinik pisinnaassutsinillu sorlernik pissarsinissaminnut  
siunissaminnut piumasaqaatinik unammisassanillu  
unamminnikkumallutik atorfissaqartitassaminnik pissarsinissaminnut  
periarfissaqartariaqarnerat. Uanga isumaga malillugu atuarfiup  
anguniagassaasa tunngaviisalu takusinnaasama pingaarnersaraat  
atuartut atuartitsissutinik tamanik inuttullu inooqatigiinnissami  
nalunngisassanik pisariaqartitsinissaat. Sulinerminni  
ataqatigiissitsinerminnilu atuartitsissutissat ataatsimut isigalugit  
inuttullu inooqatigiinneq eqqarsaatigalugu atuartut atuarfimmi  
pissarsiassamikkut "inuiaqatigiinni kinaassutsiminnik, kulturiminnik  
pingaartitaminnillu paasinninnerminnik ilisimasaminnillu  
ineriartortitsinissaat tunngavilissavaa, inuiaat allat kulturiinik  
ilisimasaqarnera paasinnissinnaaneralu ineriartortissavaa,  
oqartussaaqataanermik eqqarsartaatsimut iseriartuaartinneqarnissaa  
isumagissavaa kiisalu oqartussaaqataanerminut,  
pisinnaatitaaffeqarnerminut, pisussaaffeqarnerminut inuiaqatigiillu  
ineriartornerannut pinngortitamullu naleqqussarniarnerminut  
atuartup nammineq akisussaaqataanerminik paasinnissinnaanera  
ineriartortissallugu" (2, imm. 5).

### **Aaqqissuussineq**

Atuartunut tamanut unamminartoqartumik ineriartorfiusumik  
ilinniartitsinermi avatangiisinik pilersitsiniarluni aaqqissuussinermi,  
pingaartitassat annersaasa ilagaat, atuarfiup nalorninanngitsumik  
toqqissisimanartumillu avatangiiseqartinneqarnissaa. Ilaatigut  
pingaartuuvoq, atuarfik ima angissuseqassasoq, atuartitsissutinik  
sulinermi inillu eqqarsaatigalugit naleqquttunik avatangiiseqarnissaaq  
anguneqarsimalluni, tamakkulu pilersinneqassapput sulinermut  
naleqquttunik isigiuminartunillu initat suliffiillu "atuartitsissutissanut  
atorsinnaasunik" atortussaqarlunilu suliffissaqartut.

Ima taaneqassinnaavoq atuarfik mikineq atuarfiup anginerup iluani.

Atuarfinnik alloriarfinnut agguakkanik pilersitsisarneq  
takornartaanngilaq. Atuarfinnili amerlanerujartuinnartuni  
ineriartortinneqarput alloriarfiit nammineq aquttut ilinniartitsisunik  
aallaakkaasunik inuttaqartinneqartut atuartunillu  
amerlavallaanngitsunik suliffigiuminartunik atuartullit.

Immikkoortortani tamani suleqatigiit aningaasanik nalunaaquttallu  
akunnerinik namminneq aquttassaminnik akisussaaffilerneqassapput.

Nalunaaquttat akunneri atuartitsiffiusussat ukiumut naatsorsorlugit  
tunniunneqartassapput taakkulu atornerqarneri eqaatsumik  
nammineerluni aaqqissorneqartussaapput.

Ilinniartitsisut alloriarfinni allani pituttorsimanngippata,  
piareersartarnissaaq eqaanneroqisoq pilersinneqarsinnaavoq.  
Taamaaliorneq isumaqarpoq, ukiumut atuarfiusussamut

piareersartoqarsinnaalissasoq atuartitsinerup imarisai  
ataqatigiissunngorlugit, taamaaliornikkullu atuartitsissutinik  
atuartitsissutillu ataasiakkaat akimorlugit, pikkorissartitsisarnerit  
anguniagassallu aalajangeriikkat anguniarlugit pilersaarusiortarnek  
nikerartumik ataqatigiissaakkamillu ingerlanneqarsinnaassasoq  
atuartitsinermilu atuartitsissutissat tulluatumik ineriartortitsineq  
eqqarsaatigalugu taamaaliornikkut  
aallaavilersorneqarsinnaanngussapput.

Tamatumunnga ilanngullugu suliassanik aallussinermi hold-ikkaanik  
pilersitsineq, eqimattakkaarisarnek, marlukkaarnek imaluunnit  
kisimiilluni suliaqarneq atuartut pisariaqartitaat aallaaviilu  
tunngavigalugit suleriaatsillu pisariaqartitat atorlugit, atuartitsinerup  
siunertaa imaalu naleraralugit aaqqissuunneqartarnissaminut  
periarfissaqarnerulissaaq. Alloriarfimmi suleqatigiit aamma  
aallaavigalugit atuartut anguniagassaat nalilerneqartarnerallu  
naligiissumik oqaloqatigiinnikkut atuartunut  
saqqummiunneqartassapput, taamaaliornikkut kikkulluunniit  
tamarmik imminnut ilisimaarisinnaanngussammata kiisalu imminnut  
"ajortuni ajunngitsunilu" ataqqisinnaanngussammata.

Pisariaqarsinnaavoq ima pituttorsimanngitsigisoqassasoq klassinik  
pilersitsisarnerup klassinillu immikkut ilinniartitsisoqartitsisarnerup  
nutaamik eqqarsaatigeqqinneqarnissaa isumaliutigineqarsinnaalluni.  
Assersuutigalugu eqqarsartoqarsinnaanerluni ilinniartitsisut  
tamarmik immikkut atuartunik eqimattanik klassimi  
ilinniartitsisuuffeqarsinnaasut? "Tunngaviusumik eqimattakkaat"  
ilinniartitsisup ullumikkutut klassimi ilinniartitsisup suliassanik  
aallussiffigisaanik malinnaaffigisaanillu? "Tunngaviusumik  
eqimattakkaat" ilinniartitsisup sapaatip akunnerani atuarnerup  
aallartinneqarnerani naammassineqarneranilu najortarsinnaasai?

### **Sunniiffiqatigiittarnermut isuma**

Atuarfimmi eqaatsumik aaqqissukkami atuartitsissutit ataasiakkaat,  
atuartitsissutit akimorlugit kiisalu sammisat aalajangersimasut  
ilinniartitsissutigineqarneranni taamaaliorneqarnerup ilinniartitsinermut  
sunniiffiginnittarnera tunngaviuvoq ikorfaasoq. Taamaaliorneqarnerit  
marloqiusaasut imminnut sunniiffiqatigiinnertik tunngavigalugu  
piginnaaneqartitsilissapput. Sunniiffiqatigiinneq isumaqarpoq,  
atuartitsissutit ataasiakkaat atuartitsissutillu akimorlugit  
ilinniartitsineq aaqqissorneqarnermigut  
ajornarsiartortinneqarnermigullu ataqatigiissaarneqassasoq.  
Atuartitsissutit eqqarsaatigalugit ajornarsiartuaartitsineq atuartuni  
ataqatigiissumik ilikkariartortitsinermut tunngavissaavoq.  
Atuartitsissutillu akimorlugit sulinermi soorunami aamma  
atuartitsissutissanik ajornarsiartuaartitsineq ilaatinneqartariaqarluni.  
Tamatumunnga ilaatillugu pingaartuuvoq paasissallugu,  
anguniagassat aalajangersoreerlugit suliaqarnermi periutsit  
atuartitsissutit ataasiakkaarlugit akimorlugillu sulinernut

attuumassuteqarsinnaanerat.

Apeqqutit saqqummiussatta ajornartorsiutilluunniit anigorniagassatut siunniussatta aalajangertassavaat, atuartitsissutissat sorliit anguniagassanik aalajangiuteriikkanik sammisaqarluni atuartitsissutaassanersut.

Ajornaquteqanngilaq atuartitsissutissaq ataasiinnaq tunngavigalugu anguniagassanik aalajangiussereernikkut sammisaqarsinnaaneq.

### **Atuartitsissutissat ataasiakkaat sammineranni suleqatigiit**

Sunneeqatigiittarneq pillugu nutaamik eqqarsaataasut isumaqarput, atuartitsissutissanut tunngatillugu ataatsimiittartoqatigiit, maannamut atuarfippassuarni toquliortut, uummarsaqqittariaqarnerat.

Atuartitsissutissat ataasiakkaat akimuisullu imarisamikkut piginnassutsillu piumasqaataasut eqqarsaatigalugit ajornarsiartuaartinneqassappata imminnullu sunniiffiqatigiissappata, ajornarsiartuaartitsineq atuarfinni ataasiakkaani tigussaasunngortinneqartariaqarpoq tamannalu atuartitsissutini atuartitsissutillu ingerlanneqarnerini ilinniartitsisuusunit suleqatigiissutigineqarlunilu inerisarneqartariaqarpoq. Taamaattumik atuarfiit ilaat atuartitsissutissat pillugit suleqatigiissitanik pilersitsiortorsimapput, taakkulu atuartitsissutissat ataasiakkaat anguniagassartaat, imarisaat ineriartortinneqarnerallu suliasaraat. Ilinniartitsisut ataasiakkaat suleqatigiissitami taamaattumi ataatsimi amerlanerpaamillu marlunni suleqataassapput.

Atuartitsissutissat pillugit suleqatigiit ataatsimiittartuupput, atuartitsissutissat ataasiakkaat ilikkagassatut pilersaarusiaannik atuartitsissutissarlu pillugu anguniagassatut neriugisanik ersersitsillutillu piareersaasartussat taamaalilluni atuartitsissutissap ajornarsiartuaarnissaanik piareersaasiat piviusunngortitersinnalersillugit. Suliap taassuma siunertaraa atuartitsissutissanut tunngatillugu nalunngisassat piginnaasassallu ajornarsiartuaartumik alloriarnertalinnik erseqqissarneqarnissaat. Taamaaliorneq tunngaviussaaq atuartut piginnaassusaat pisariaqartitaallu aallavigalugit atuartitsinermi anguniagassanik ilikkagassatullu anguniagassanik piareersaanermi. Ilaatigullu atuartitsinermi periusissanik atortussanillu qinersinermi atuartut unamminartunik sammisaqartinneqarnissaat taamaaliornikkut anguneqarsinnaavoq.

Ilanngullugu taamaaliornermi atuartup ajornarsiartuaartitsinermut namminerlu ilikkariartornerminut maluginnissinnaaneranut periarfissai allisarneqassapput taamaaliornikkullu atuartitsinerup piareersarneqarneranut ingerlanneqarneranullu atuartup akisussaaqataanera allisarneqassaaq.

Naggataatigut taamaaliortarneq qaqugukkut qanorlu iliorluni atuartitsissutit atuartitsissutissat akimorlugit anguniagassanillu aalajangeriikkanik suliaqarnermi periutsit atorlugit

ingerlanneqarsinnaaneraniq qulaajaanissamut aallaaviusinnaassaaq. Atuartitsissutit pillugit suleqatigiit suliaasa ilagissavaat tamakkiisumik misilittakkanik taarsiivigeqatigiittarneq suliallu pillugit qanoq iliuutsinik suleriaatsinillu oqallittarfiussalluni, taamaalilluni atuartut anguniakkallu atuartitsinermi anguniakkanik tunisinnaanerujumallugit. Tamatumunnga atuupput atuartitsissutit ataasiakkaat atuartitsissutit akimorlugit anguniakkanillu aalajangiussereerluni atuartitsisarneq, atuartitsissutit ataasiakkaat tunniussisinnaaneraniq eqqarsaatigalugu.

### **Alloriarfimmi suleqatigiit**

Taamaalilluta eqqarsaatitta aallarnerfia tikeqqipparput, tassalu alloriarfimmi suleqatigiit, taakkua atuartitsissutinik tunngaviusut katitissavaat inatsisitigut atuartitsissutissanut atuartitsissutissallu akimorlugit ingerlatsinissamut piunasaqaatit ataqatigiississavaat taamaaliornerminnilu atuartut pisariaqartitaat piginnaasaallu tunngaviginiartussaavaat. Atuartitsinerup aqqissorneqarnera immikkoortortami suleqatigiit sulineraniq aallaaveqassaaq. Alloriarfimmi suleqatigiit atuartitsinerup imarisaasa aqqissorneqarnerisalu ingerlanneqarnissaat akisussaaffigissavaat, taamaaliornerminnilu immikkut atuartitsisarneq ilinniartitsisullu piareersariikkamik peqanngittarnissaat aallaavittut taputartuuttassavaat.

Alloriarfimmi suleqatigiit ilinniartitsisut piareersariikkamik peqanngittarnissaat tunngavigalugit atuartut atuartitsissutini ataasiakkaani ukiumut nalunaaquttat akunnerini atuartitaaffissaasa eqqortinneqarnissaat isumagissavaat taamaaliornerminnilu suleqatigiit nalunaaquttap akunneri nammineq akisussaaffigalugit atugassatik iluaqutigissavaat, vikareqartarneq ingalassimaniarlugu. Tamanna toqqissisimanermik eqqissillunilu sulisinnaanermik pilersitsisarpoq, tassami atuartut ilinniartitsisut nalunngisatik aammalu ilinniartitsisut meeqqanik nalunnginnittut taamaalillutik imminnut ataqatigiittuassapput.


Alloriarfimmi suleqatigiit imatut amerlassuseqassapput atuartitsissutini ataasiakkaani atuartitsissutillu akimorlugit sulineq naammassineqarsinnaanngorlugu. Tamanna isumaqarput ilinniartitsisut atuartunik eqaatsumik suleqateqassasut atuartullu suleqatigiinnerminni eqimattakkuutaartuussasut, klassikkaassasut hold-ikkaassasulluuniit. Taamatut sulineq ukiumoortumik ukiorluunniit aggulullugu sulinerusinnaavoq. Immikkoortortani suleqatigiit nammineerlutik suliasatik/atuartitsissutissatik akunnerminni agguassavaat, atuartitsissutissallu ukiumoortumik atuartitsissutigineqarnissaasa aggulunneri ilinniartitsisunut arlalinnut tunniunneqarsinnaapput atuartitsissutissap taamaaliornissamut periarfissarititai innarlinngippata. Ilinniartitsisut ilaqarput annertuumik atuartitsissutissap ataatsip iluani alloriarfimmi



mikinngitsumik pikkoriffeqarsinnaasunik, taamaalillutillu taakkua atuartitsinermi apeqataasinnaalissapput"!



Immikkoortortani suleqatigiit atuartitsissutissanilu a'taasiakkaani suleqatigiit sunniffigeqatigiissinnaanerit imatut takussuffissiorneqarsinnaavoq:



### Alloriarfimmi suleqatigiinnut nikeriarsinnaajunnaarluni pituttugaaneq?

Ilinniartitsisut perorsaaneq pillugu atuartitsissutinullu piginnaasassaaminut piunaffigineqarnerisa allaasup aammalu ilinniartitsisut naalakkiisinnaassuseqarnerminnik aammalu ilinniartitsisut taamaattussaaginnartutut isigineqarnerisa allanngornerat ilutigalugu "pinngitsaalisaapput" inuttut saqqummernissaminut, taamaattoqarneratali kingunerisimagunarpaa immikkut ilisimasaqaleriartornermik ilinniartitsisut akornanni pilersitsiartuaaneq.


Atuarfinni arlalinni nalinginnaajartuinnartoq malugisimavara, ilinniartitsisut aalaakkannerusumik nukarlerni, akullerni angajullerniluunniit nikeranngitsumik ilinniartitsisutut inissittarnerat. Ineriartorneq ima sukkatigilersimavoq, 10. klassimiit 1. klassimut nikeriarneq nutaamillu ingerlatseqqilerneq ima annertutigisunik aporfissartaqartoq taamaaliornissaq orniginarunnaarluni. Immineerluni pitsaassuseqarpoq piginnaassutsit tamaviaarluni immikkullu suliaqarluni ineriartortissimasat pigiinnarneqarnissaat. Aappaatigulli aamma pitsaassuseqarpoq ilinniartitsinerup ajornarsiartuaartinneqarnerani ingerlaavartumi misiliisimanermi misilittagaqalersimanermilu piginnaassusitaarsimaneq. Tamanna iluarsineqarsinnaavoq, assersuutigalugu piffissami ilinniartitsisuuffiup ilaani nukarlerni sulisinnaaneq, kisiannili pisariaqarsinnaavoq (piumasaqaataavoq?) atuartitsinerup ilaani nutaanik misiliisinnaaneq taamaalilluni atuartitat annerusunut ingerlaqqinneranni malissinnaangorlugit. Isumaqarluinnarpunga, ilinniartitsisutut atuartitsissutit ajornarsiartuaartinneqarnerinik paasinninnissamut taamaaliorsinnaaneq tunngaviusinnaasoq - ingammik aalajangersimasumik anguniagaqarluni ilinniartitsinerup ajornarsiartuaartinneqartarnera eqqarsaatigissagaanni.

### **Inuttut naleqassuseqarnermik misigisimasaqarluni meeqqanut tamanut siunissaqarneq**

Atuarfik imaaliinnarluni angajoqqaanit ilisarineqarsinnaanngitsoq aallaqqaasiininni eqqartorpakka. Immitsinnut erseqqissartariaqarparput, oqaluttuarsuit naleqassuseerunnerisa inuillu ataasiakkat inuttut ineriartornissamik piumasaqaataasa qitiutinneqalernerisigut atuarfik siunissami angajoqqaanit namminneq meeqqamik "peqataatinneqarnissaannik" piumasaqarfigineqalissasoq. Tamanna anguniarlugu atuartut ataasiakkaat kisiisa eqqarsaatigalugit atuartitsinermik nikerartitsineq, mumingasumik sakkortuumik oqaatigissagaanni, anguniagaasariaqanngilaq. Akerlianillu akissutissaavoq, ataatsimoorussatsinnik naleqartitaqarnitta iperarnaveersaarneqarnissaa, taakkuami naleqartitagut atuarfiup anguniagaani tunnaviinilu ersersinneqarput, ataatsimoorussamik atuarfeqarnissatsinnut tunngaviullutik: Kulturinik allanik paasinnissinnaaneq, pinngortitamik ataqateqarneq, inuiaat akornanni inuttut piginnaatitaaffiit naalakkersuinikkullu oqartussaaqataaneq. Tamakkua atuarfitalammut aallaaviupput, tamakkualu atuartunut tamanut inuttut ineriartornissamik unamminartunillu sammisaqarnissanik imaqarput. Tamanna aningaasarsiornerup aqutsineranik inuttullu ataasiakkaatut piumasanik pisariaqartitanillu pissarsiniarnermik kiminneqassanngilaq, tunngaveqassallunili inuiaqatigiit meerartaasa inuttut naleqarlutik siunissaqarnissaannik tamakkiussamik kissaateqarnermik.



### Atuarfeeraq atuariup iluani



### Atuagassatut innersuussutit

Atuarfik pillugu Inatsisartut peqqussutaat nr. 8 21. maj 2002-meersoq

Kaali Olsen: Atuarfik silarsuarmi allanngoriartortuarmi! AG-mi 14/8-2001

Mogens Hansen: Håndværkets skole, Krogs Forlag, 1997

Steen Larsen: Den ultimative formel, nammineq saqqummersitat, 1998

Erik Torm: Skolen uden skema – fleksibel planlægning af

skoledagen,  
aappassaanik naqiteqqitaaq, Dafolo Forlag, 2.udg., 1999.  
[www.dafolo.dk/](http://www.dafolo.dk/)

Hanna A Hansen og Erik Torm: Atuarfik eqaatsumik aaqqissigaaq –  
Fleksibel skole, Eget forlag, 2005 ([Link til hæftet](#))

Lise Tingleff Nielsen og Mette Løvbjerg: Fleksibel planlægning,  
Forlaget CVU København og Nordsjælland, KLEO, 2002,  
[www.kleo.dk/](http://www.kleo.dk/)

Finn Held m.fl. (red.): Introduktion til undervisning,  
kapitel 1: Skolen som pædagogisk arkitektur (v/E.Torm), Frydenlund  
2003  
[www.frydenlund.dk/](http://www.frydenlund.dk/)

Periutsit atortussiallu – Metoder og Værktøjer – Atuarfitsialak ,  
Inerisaavik 2003 [www.p-center.gl](http://www.p-center.gl)

Atuartup imminut nalilersornera/naliliiffiginera – Elevernes egen  
vurdering/  
evaluering, Inerisaavik 2005